

Luxia Arrabiosa

Contu po is pipius



Biviat in Sardigna una coga chi si naràt Luxia Arrabiosa.

Calincunu narat chi fiat manna manna, calincunu àteru narat chi fiat pitichedda pitichedda, cumenti una jana.

Issa fiat poderosa, arrica e ingordigosa.

Biviat in una gruta manna meda, e aintru ddoi teniat ònnia cosa: cosa de papai e de bufai, prendas de oru e de prata.

A de dī Luxia dromiat e a de noti abarràt abilla, si setziat in s'oru de sa gruta aici chi nemus podiat intrai a ndi furai is cosas suas.

E candu issa dromiat, su fusu acogau cosa sua agordat sa domu: chi calincunu si acostàt a sa gruta, su fusu inghitzàt a trotolai fintzas chi sa meri si ndi scidàt.

Una borta, candu s'ierru fiat longu e lègiu, i sartus fiant cingelaus e no cresciat nudda.

In beranu no ddoi fiat trigu e in s'istadi nisciunu ddu podiat messai.

Sceti Luxia Arrabiosa , chi fiat arrica meda, no iat sunfri su fàmini.

Issa fiat aici arrica chi podiat agiudai sa genti, ma fiat aici ingordigosa ca no iat arregalau nudda, nimancu unu granu de trigu.

Una dî, una pariga de òminis iant detzìdiu de furai cuncua cosa a sa coga bècia.

Fiant andaus a chitzi, poita sciant chi issa a de noti fiat abilla ma a de dî fiat dromida.

Candu si fiant acostaus a s'oru de sa gruta, su fusu iat inghitzau a trotolai de pressi e a fai unu sonu de bentu insurdadori.

Luegus Luxia Arrabiosa si ndi fiat scidada e si ndi fiat pesada.

Is òminis si ndi fiant atzicaus e si fiant fuis a lestru, unu perou iat imbrunchiau e nci fiat arrutu a terra.

Luxia dd'iat nau a tzèrrius: "imou ti ddu fatzu biri deu ita bolit nai a mi ndi furai is cosas mias!"

Su fusu iat torrau a trotolai fadendu sonu meda, poita no podiat sunfriri is tzèrrius de cuss'òmini.

Si ndi fiat pesau a celu e a pustis si nci fiat ghetau in su forru, e si fiat abbruxau.

Candu Luxia Arrabiosa iat biu su fusu suu abbruxendi, disisperada, si ndi fiat tirada is pilus de conca.

"Cumenti apu a fai a filai imou? Chini at a castiai sa gruta mia a de dî?" naràt tzerriendu.

De cussu momentu Luxia Arrabiosa no iat dromiu prus, ni a de noti ni a de dî, e fiat diventada una cixara pitia pitia, e andàt arreu chenza de si fai biri intra is arrocas e is moris de sa gruta manna cosa sua.

Candu intendis una cixara chi cantat, no ti acostis: est Luxia Arrabiosa chi prangit po su fusu cosa sua, chi agordàt sa grutas e is prendas de oru e de prata.